

江都縣志

人物志第一 亮績

孝友 德行

第陸册

江都縣志卷之十九

江都縣知縣五格重修

人物忠節

忠爲令德而仗節者乃至不有其身耿耿乎挺精英貫金石矣易曰蒙難以守貞孔子曰殺身以成仁所以死者不一而其於效忠致命也則一間氣之所篤生國家之所培養此蓋非偶然者當其時秉義不回直可使星日爲之無光鬼神爲之飲泣則夫曠百世而相感雖游談所及亦且變色易容歛歔焉而不能已况履其地以徵其信者乎志忠

江都縣志

卷之十九忠節

一

節

**漢**蔣子文漢末爲秣陵尉逐盜至鍾山爲盜擊傷其額死後吳主追封爲都中侯立廟祀之

**宋**梁曠爲山陽內史廣陵王誕反執其妻子遣使要曠曠斬使拒之誕怒滅其家及誕平朝廷嘉其誠節擢後將軍

**梁**來疑字德山幼有奇節侯景陷臺城廣陵太守祖皓在城中將見殺疑乃說皓起兵討逆皓曰僕所願也死且甘心爲要勇士耿先等百餘人襲殺景黨董紹先及皓敗疑并兄弟子姪遇害者十六人

隋來護兒字崇善幼好奇節讀詩至擊鼓其鏜踴躍用兵羔裘豹飾孔武有力舍書歎曰大丈夫當如是安能區區久事隴畝羣輩驚其言而壯其志賀若弼之鎮壽州也常令護兒爲間諜授大都督平陳之役護兒有功焉進位上開府從楊素擊高智慧於浙江賊據岸爲營周亘百餘里船艦蔽江素令護兒率數百輕艦徑登江岸直掩其營破之賊潰散護兒追至泉州智慧窮蹙遁走閩越進位大將軍除泉州刺史時盛道延擁兵作亂護兒進擊破之又破汪文進於黟歙進位柱國仁壽三年除瀛州刺史賜爵黃縣公大業六年從駕江都賜物

江都縣志

卷之十九

忠節

二

千段令上先人塚宴父老州里榮之數歲轉右翊衛大將軍遼東之役護兒率樓船指滄海入自涿水去平壤六十里與高麗相遇進擊大破之乘勝直造城下破其郭郭明年又出滄海道師次東萊會楊元感作逆勒兵與宇文述等擊破之封榮國公十年又帥師渡海至卑奢城高麗舉國來戰大破之斬首千餘級將趨平壤高元震懼遣使上表請降尋有詔旋師轉左翊衛大將軍開府儀同三司江都之難宇文化及忌而害之長子楷以父軍功授散騎郎朝散大夫楷弟弘仕至果毅郎將金紫光祿大夫弘弟整武賁郎將右光祿大夫化及反

皆遇害惟少子恒濟獲免

又按隋書云整驍勇善撫士討羣盜所向皆捷賊甚憚之

為作歌曰長白山頭百戰場十五五把長槍不畏官軍十萬衆只畏榮公第六郎非遇害化及將不免

宋吳駿發少遊鄉校常有投筆志紹定間李全擁衆攻揚州郡守募良家子守禦駿發應募賊平補將校後以戰功累遷鎮江右軍統領元兵據盱眙賈似道遣兵攻之駿發為前鋒先登將一鼓而下會元援兵至駿發死之

張琰字汝玉侗儻有節槩宋末補州牙兵隨制置李庭芝潰圍赴行在為追兵所及力戰死琰能詩皆忠憤所發

江都縣志

卷之十九 忠節

三

明郭任建文時為戶部侍郎靖難兵至被執不屈死裔

孫允寧進士官御史

續藏書謂任丹徒人而萬歷府志載入江都因之

張恒世襲揚州衛指揮使恒長身廣顙負膽畧能拊士卒累官淮揚叅將致仕嘉靖丙辰倭由通泰犯揚州撫按即家起之賊薄城而攻恒與千戶羅大爵百戶曾沂率兵禦之賊設伏教場後門以數人挑戰伏發恒與大爵沂皆及於難後賊平以恒非見任官不以聞萬歷間巡撫白其事始以恒崇祀報功祠春秋與祭

陳輔堯字九室萬歷中舉於鄉令歸善考績以天下第一清官擬授御史既而改牧膠州有餽山繭者受而懸

之公署陞永平府同知甫至任經畧檄赴瀋陽印馬事未竣而遼陷從者諷之急去輔堯曰孰非封疆臣奚去爲引佩刀自刎以死事聞贈按察使司僉事謚忠烈建祠於江都西門與高邦佐並祀稱雙忠

高邦佐字以道襄陵人隨父業齧於揚萬歷二十三年成進士歷官薊州道終養歸天啟初起叅政分守廣寧值熊廷弼王化貞構隙邦佐知事必敗乞歸方報允而化貞棄廣寧走衆謂邦佐可入邦佐叱曰吾一日未去則一日封疆臣也將安之夜作書訣母策騎謁廷弼請授兵赴難廷弼不納邦佐仰天長歎泣語從者曰松

江都縣志

卷之十九

忠節

四

山吾守地當死此汝歸報太夫人遂解印綬自經僕高永亦自經於側事聞贈太僕寺卿謚忠節

郝景春字自古萬歷壬子舉於鄉署鹽城教諭罷歸起雜職歷知房縣時賊張獻忠等九營就撫鄖陽羅汝才屯房東白貴屯房北黑雲都屯房西景春以賊叵測獨請勦上官不聽一日汝才合三營逼房城景春擊之多斬馘上官數以朝命諭景春景春乃單騎入汝才營與結盟信旣而獻忠叛穀城率衆圍房縣景春部署其子鳴鸞及僚吏分門守賊掘人墓取棺戴之首以攻城景春於城上然草并投石擊之賊掘城城上以熱油灌之

賊立雲梯則設鈎鈎其梯斷之又設銃擊斃數百人凡五晝夜獻忠欲解去降賊指揮張三錫縋一賊上羣賊繼之城遂陷羅汝才以數十騎擁景春去景春待其子鳴鸞至相抱哭以手畫其頸曰此下不甚痛吾父子決計死耳汝才從容勸景春降景春勃然曰天下豈有降賊知縣乎於是與其子及僕陳宜見獻忠罵益厲獻忠怒命牽景春父子并僕陳宜俱殺之贈太僕寺少卿建祠江都以鳴鸞祔

王道隆字萱生天啟甲子舉於鄉除壽州教諭以端亮範士陞濱州知州治訟明允他邑咸質成焉壬午冬流

江都縣志

卷之十九

忠節

五

寇至濱陷道隆身被數創慷慨不屈死家屬十餘口俱被難及櫬歸濱之士民哭送數十里外立祠表其忠高孝誌字仲達尚書銓之曾孫天啟丁卯舉於鄉授豐縣教諭陞信陽知州時流賊橫熾楚豫間歲復大歉人相啖孝誌竭橐糴穀以賑又晝夜設備守禦防不測監司王瑄恣睢乖戾更置孝誌所部署命弛備以撫賊孝誌力爭不得未幾賊舉火登陴城潰孝誌方率衆巷戰賊已踞州堂矣縛孝誌逼降罵賊不屈死事聞贈河南布政司叅政蔭一子入監祀名宦鄉賢古道行崇徵辛未武進士慷慨任俠行兵按司馬法以

叅將守駱馬湖庚辰寇至道行帥兵禦之戰累勝援師不至竟歿於陣

楊廷璧字荆璞以貢生授舒城教諭賊張獻忠寇邑璧分守西門語縣令曰予職非守土今日之事義不可辭萬一不守張許吾師也鼓勵軍士嚴守三晝夜矢石皆盡城陷被執罵賊遇害子生員濟之亦殉父死

梁于涖字飲光崇徵癸未進士知萬安縣蒞任甫一月大兵下萬安于涖自投於縵家人救之不死又投江爲邏者所獲囚之南昌獄幅巾布袍談笑賦一詩自經死其詩云但知生富貴誰識死功名到頭成箇是方見

## 江都縣志

### 卷之十九

忠節

### 六

古人情時家奴梁善杜忠龔明張聰聰婦徐俱從死鄭爲虹字天玉崇徵癸未進士除浦城令擢御史巡仙霞關駐浦城時鄭芝龍盡撤守關將仙霞嶺二百里間虛無一人 大兵入閩爲虹亟還浦城縱士民出走自守空城爲兵所執死之年二十有五僕陳龍亦從死韓鼎新字煥然以明經授浙江某縣教諭城破公服縊堂上死

饒餘字吉人性至孝父母歿家貧塋祭不能成禮每讀書至夜分則哭哭已復讀聞者爲之泣下乙酉城破自縊年三十六先餘聞李自成陷京師慷慨激烈憤不欲

生至是竟死

韓默字文適先世臨汾人家揚州補江都學諸生善書法尤工臨摹督師史可法駐兵揚州謹重國書延默至軍門以賓禮見可法見其氣象粹然儒者欲官之默辭去及城破默急歸謂妻蕭氏曰吾讀聖人書當守義死不可苟活若自爲計乃易儒巾服襴衫皂緜鞞旣肅遂墜井死長子彥超亦墜井死蕭與女皆自縊另有傳越一年居人有浚井者出默尸面目如生衣冠整潔惟左手損一小指左足脫一鞞而已家人伏尸哭左鼻忽出血人皆驚異乃棺殮以葬焉

江都縣志

卷之十九

忠節

七

胡如琯字卽公桐城諸生淵雅有器量史可法高弟也鎮維揚日辟爲書記露布封事皆出其手可法誓以身殉國如琯亦義不負可法預作書訣家人揚州陷死之

如琯死義江都舊失傳採龍眠志補

高孝纘字申伯邑諸生乙酉城破書衣衿曰首陽志睢陽氣不二其心古今一致入學宮自經先聖座前

宋祥遠字玄來少補諸生居恒以氣節自負乙酉城陷撫其子曰有汝以延先祀吾二人不敢偷生矣與其妻雙纒縊於庭祥遠淹博爾雅工詩古文詞著有聽月山房集世所傳誦其從容就義蓋亦篤信好學之力也



王士琇揚州諸生乙酉城陷時設莊烈帝位泣拜與其弟同縊

金鼐學諸生城破日衣青衿同妻某氏對縊而死越八日夫婦面色如生

王廷珮學諸生同弟廷璉廷瑜見城不可守命酒環飲題壁作大書從容盡節

張暎發學諸生邵伯鎮人際變投井死

劉慶遠學諸生城陷投江死

呂學齊學諸生城陷投新橋河死

高一麟職指揮城陷自刎

江都縣志

卷之十九

忠節

八

汪應坤邵伯鎮諸生兵至自縊死子銓觸石死

汪自盤縣諸生城陷同妻蔡氏投井死

王纘字伯縣王績字亞縣王續字叔縣城陷兄弟三人並縊死

戴之藩武生城陷殉節

史大相大儒兄弟也皆邑諸生城陷大相自縊死大儒巾服拜辭父抱兄屍而死

陳三益字友三文學有節槩乙酉城陷投於水死妻張氏貞操歷三十年有如一曰

陸某以吏侍督師史可法及可法遇害陸亦自縊死

陳天拔醫士城陷以殉義自盡

陸愉業畫工城陷自盡而死

張有德應募義兵也城陷自殺

馮應昌市民城陷死義

徐某失其名以操舟爲業城陷投水死

以上見舊志其  
他秉節死義而

姓氏失傳者甚衆惟闡  
幽表微之君子留意焉

張伯鯨字繩海萬歷丙辰進士歷知會稽歸安鄞三縣  
崇徵初遷戶部主事出督延寧二鎮軍儲自黃甫川西  
抵寧夏千二百里不產五穀芻粟資內地賀蘭山東抵  
花馬池素沃野亦荒蕪甚伯鯨疏陳其狀爲通商賈轉

江都縣志

卷之十九

忠節

九

菽麥又做邊商中鹽意立官市法以招之軍民稱便盜  
起延綏叅巡撫籌畫俘獲賊魁不沾泥擢兵備僉事又  
破斬賀思賢一座城金翅鵬等進右叅政及巡撫陳奇  
瑜遷總督遂擢伯鯨右僉都御史代之伯鯨泣延綏久  
以拾遺論罷民大失望尋論功起用召爲兵部添設左  
侍郎攝尚書事以疾乞休福王立伯鯨家居不出後與  
史可法分城固守順治二年揚州陷伯鯨死之時伯鯨  
妻韓氏冢婦郝氏俱及於難

國朝董潏字禹門江都人繫籍奉天由恩貢順治三年隨  
征福建以功授沙縣知縣時閩疆新定潏善撫字百姓

安之四年有山賊羅某與妖僧米逢年共爲亂羅賊寇沙潏屢出戰屢敗之賊環攻三閱月不退潏守益堅一日賊攻東門潏并力禦東門而逢年誘縣丞黎某開西門納賊潏急令其子亦舒壻張思治率家丁五十三人與賊巷戰並死焉潏被執罵賊甚厲賊怒叢射之仍割其頭去妻葉氏抱一歲孫鬻匿民舍以免事聞 贈福建按察司僉事賜祭葬孫長蔭知縣歷馬湖府知府以治績著

孫之烈字式武官江西都指揮順治初調征楚至鄱陽上蘭力戰俘馘無算以援兵不至死之士人王紳有悼

江都縣志

卷之十九

忠節

十

忠歌紀其事

卜明元少負遠志喜游俠經畧洪承疇奇之置幕府屢著異績薦授平越府推官時黔中初定遺氛未靖賊來寇平越督戰不屈死之承疇爲具疏請卹

閔文仲邑之瓜洲人爲名諸生順治己亥海兵寇瓜洲文仲居圍城中倡義固守及城陷寇執之不屈以刃畫其面文仲卽投井死

